

ABDULLA ORIPOV SHE'RLARIDA TABIAT TASVIRI

Sadoqat Hamrayeva

Alisher Navoiy nomidagi Toshkent davlat o'zbek tili va adabiyoti
Universiteti O'zbek tili va adabiyoti fakulteti 1-bosqich talabasi

Annotation.

This article analyzes the artistic aspects of the depiction of nature in the poems of the People's Poet of Uzbekistan Abdulla Aripov. Conclusions are made about the secrets of the harmony of image and poetic content

Keywords:

Uzbek poetry, Abdulla Aripov, nature and art

Go'zal va serjilo vohaning tog'li kengliklarida voyaga yetgan, ona tabiatning betakrorligi va go'zalligidan ilhomlangan, sodda va mehridaryo insonlar ichida kamolga yetgan serqirra ijodkor, she'rlari bilan bashariyat ko'ngliga kirib borgan buyuk shoir O'zbekiston Qahramoni Abdulla Oripov garchi oramizda bo'lmasalar-da, u insonning ijodi hamon e'tiborimizdadir. "Belgiliki, insonning ruhiy holati va kayfiyatini manzaralashtirish uchun ulkan iste'dod lozim. Bu jihatdan Abdulla Orif talanti tengsiz qudratga ega" [1. Qozoqboy Yo'ldosh. Ochqich so'z. 658-bet]. Shoir ijodiga nazar tashlasak, tabiatga oshuftalik, tabiat bag'rida voyaga yetgan inson ruhiyati va albatta xayoliy mavjlanishlarga guvoh bo'lamiz. Shoirning she'rlarida tabiat lirikasi shu qadar jonli ifoda etiladiki, o'quvchi o'zini shu muhitda o'sha manzarada yashayotgandek his qiladi:

Eh, siz tog'lar naqadar ko'rkam,
Sizga berar ilk nurin quyosh.
Par bulutlar marvarid qorlar,
Yuksak cho'qqi uzra qo'ygan bosh.

[2. Abdulla Oripov. Tanlangan asarlar, Birinchi jild, 16-bet].

Yuqoridagi misralarda aks etgan peyzaj (tabiat tasviri) xuddi rassom chizgan suratdek o'quvchi ko'z o'ngida namoyon bo'ladi. 3-misradagi qorga berilgan o'xshatish ya'ni marvarid so'zi qorning xuddi marvarid kabi tovlanishini sezish mumkin. Nafaqat o'xshatish balki tasvirlash mahoratiga e'tibor qaratadigan bo'lsak tog'larning yuksakligi tufayli bulutlarning tog'lar yelkasiga bosh qo'yishi hamda quyoshning ilk nuri ham unga talpinishini ko'rish mumkin. Shu she'rning oxirida shunday tugallanma keladi:

Eh, siz tog'lar, dilrabo tog'lar,
Yosh qalbimni maftun etgansiz.
Yoshlik, baxtni kuylagin, deya,
Ijodimga ilhom tutgansiz.

Ushbu she'rga "1958" deb sana qo'yilgan. Qolaversa anglash mumkinki, *ijodining boshida shoir tabiat manzaralarini ijtimoiy motivlarsiz – nekin tarzda tasvirlagan.*

Shoir ijodi xilma-xil va rang-barang unda hayot, ijod, inson tasviri va qiyinchiliklar va shu bilan bir qatorda xayoliy tasvirlar tabiat kompozitsiyasi bilan aloqador tarzda ifoda etiladi. Shoir ijodida tabiat lirikasi ustuvor ekanligini shoirning o'zi ta'kidlagan quyidagi fikrlardan ham bilish mumkin. "Qo'ng'irtov etaklari ming-ming xil o't-o'lan, chuchmomoqizg'aldoqlar bilan qoplanar, atrof tevarak jannatiy bir manzara kasb etardi. Ayniqsa bu joylarda janub kechalari yulduzli osmon nihoyatda go'zal bo'lardi. Tim qora osmonda qo'l cho'zsang yetgudek ulkan-ulkan novvotrang yulduzlar charaqlab turardi" [3. Abdulla Oripov. Tanlangan asarlar, Yettinchi jild, 166-bet]. Mana shunday muhit, Ollah yuqtirgan qobiliyat

tufayli “Porloq yulduzlarday kulgim keladi” deya orzu qilgan ijodkor sekin-asta ijod muhitining yetakchilaridan biriga aylana boshladi.

Shoir ongiga tabiat tasvirining eng serjilo misralari quyilib kelgan desak mubolag‘a bo‘lmaydi. Quyidagi she‘rni fikrimiz isboti sifatida keltirsak :

Kapalakning uchishin uzoq,
Kuzatdim ham yurdim ortidan.
Qarshimizda g‘unchalar porloq,
Miltir shudring chaman sathidan.
Allaqayda kezib tinimsiz
Yig‘dik rosa zavq atirlarin.
So‘ngra baham ko‘rdik ikkimiz,
Menga tegdi shu satrlarim.

Yuqoridagi “Kapalak va men” she‘rida (Birinchi jild, 17-bet) shoir bir she‘rning yozilishidagi holatni ifodalagan deya ayta olamiz. Bunda shoir uchun kapalak ilhom bo‘lsa uning ketida shoir zavq ila go‘zallik izlamoqda va shu asnoda she‘r dunyoga keldi. Naqadar ajoyib tarzda ifodalash uslubi shoirning yana bir bor mahorat ustasi ekanligidan dalolat beradi. Sirtidan qaraganda oddiydek tuyulgan she‘rdan quyidagi xuloslar chiqarish mumkin:

1. Kapalak – o‘tkinchi umr ramzi. 2. Kapalak – go‘zal olam – go‘zal umrni qadrlash ramzi. 3. Shunday manzaralar ta‘siridagi hukm – shoirlikni tanlash.

Tongni ham osmonga tik boqib kutdim,
Kuzatdim birma-bir yulduzlarni ham.
Xayol daryosida o‘zni yo‘qotdim

Boshimdan koinot zar sochgani dam. (Birinchi jild, 20-bet)

Yuqoridagi misralarga e‘tiboa qaratsak, Shoirning tabiat tasviri orqali o‘z kechinmalarini ifoda etganini ko‘ramiz. Tong – bu misoli shoir kutgan orzular ,maqsadlar uning ro‘yobi uchun harakat qilib osmonga tik boqishi va atrofdagi yulduzlar esa shoirning ishongan haqiqati uning hayotni o‘z ko‘zi bilan tasavvur qiluvchi bir bo‘lagi. Keyingi misrada yulduzlarni ya‘ni hayotni kuzatayotgan shoir xayollar og‘ushida atrofdagi mayda ikirchikirlar ichida qolib, o‘zini yo‘qotib qo‘yganini ta‘kidlaydi. Xuddi shu she‘rning keyingi satrida esa:

Yulduzlar! Berkinmang tong tumaniga,
Ketmang ko‘zlarimni yoshlab ketguncha.
Yakka suhbatdoshim, ketmagin Zuhram
Ketma, senga aytgan she‘rim bitguncha.

Inson va albatta shoirning ham hayot yo‘li bor. Uning ham xato kamchiliklari bor. Xuddi shu asnoda yuqorida yulduzlar deya o‘z hayotiga orzu umidlariga da‘vat qilayotgan shoir, orzularidan hayotdan ajralib qolishini istamaydi- “ko‘zlarini yosh tomchilari ila” qoldirib ketmasligini o‘tinib so‘raydi, hatto o‘sha Zuhro yulduziga “men hali hayotni o‘zim yaratishim kerak” hali o‘zi orzu qilgan hayotga ya‘ni hayot baytlarini yozgunicha u bilan suhbatdosh sirdosh bo‘lishi haqidagi o‘tinchi bilan yakunlanadi:

Nimani xohlayman istagim nima?
Changalzor shovqinin tinglab turaman.
Yaproqlar bandida kezgan jimgina,
Ma‘yus va bezovta kuzni ko‘raman.
Uning qo‘shig‘ida uning ohida

Sezaman odamzod qalbin gohida. (O‘sha manba, 27-bet)

Nazarimda shu she‘rdan boshlab tabiat tasviri zamiriga ijtimoiy ma‘nolar singdirila boshlagan. “*Changalzor shovqini*”, “*ma‘yus va bezovta kuz*” shoirning shaxsiy hayotiga, hayot chigalliklariga ishora go‘yo.

Mangu yaxshilikning maskani qayda?
Qaydadir xazonni bilmagan bahor?
Nechun u hovliqib oqquvchi soyda,
Chavandoz umrining qaytmas sehri bor?!
Nechun uyg'onadi qaytadan bahor,

Nechun inson umri bo'lmagan takror?.. (O'sha manba, 28-bet)

Darhaqiqat hayot shundayki, unda bahor ham har yili qaytariladi. Ammo har bahorda umrning qaytmas onlari chavandoz kabi yugurib o'tadi. Hayotda faqat oldinga intilish uning g'animat ekanligini tushunish va inson umri hech qachon bahor kabi qaytmasligi, hayotni yaxshi amallar va faqat eng chiroyli onlar bilan bezash darkor ekanligi, faqatgina bahor kabi yam-yashillikka go'zallikka burkangan xayollar og'ushida umr o'tkazishi kerakligi shoir qalbida takrorlanaveradi. Endi she'rda bahor tasviri – shoshqin umr unsurlaridan biri. Xazon – umr poyoni. Bu yerdagi tazod – *yoshlik va o'lim ibtido va intiho haqida* eslatib tribdi. Akademik olim Matyoqub Qo'shjonov haqli ta'kidlagan edi: "Hayotga intilayotgan butun tabiat olami, boshiga har qanday kulfat tushmasin, yengaman, o'saman, ulg'ayaman, ko'rkam bo'laman deydi. Bu tabiat qonuni. Kichik bir she'rda shu katta ma'noni sig'dirish uchun hayotda olg'a boqadigan, olg'a boqib, uzoqlarni ko'radigan, eng muhimi kuzatilgan voqeadan ma'no chiqara oladigan iste'dod bo'lishi kerak edi. Abdulla yoshligidanoq o'zini shunday iste'dod sifatida ko'rsatdi" [4. Matyoqub Qo'shjonov, Saylanma. Birinchi jild. 346-bet].

Foydalanilgan adabiyotlar ro'yxati:

1. Қозокбой Йўлдош. Очқич сўз. Тафаккур нашриёти. Т.: 2019. – 688 б.
2. Абдулла Орипов. Танланган асарлар. Биринчи жилд. Гафур Гулом номидаги Адабиёт ва санъат нашриёти. Т.: 2000. – 432 б.
3. Абдулла Орипов. Танланган асарлар. Еттинчи жилд. Гафур Гулом номидаги Адабиёт ва санъат нашриёти. Т.: 2013. – 300 б.
4. Қўшжонов М. Сайланма. Икки жилдлик. Биринчи жилд. Гафур Гулом номидаги Адабиёт ва санъат нашриёти. Т.: 1982. – 384 б.